

乾隆歷城縣志

歷城縣志卷第四十五

列傳十一

仙釋

漢志有神仙十家曰神仙者保性命之真游求於其外者也雖與醫經經方同列方技其術業固殊矣後漢書乃統名之曰方術傳魏書則於釋老別為之志元史列傳竟分為二唐荆川左編因之王龍溪述其撰著之旨可為史法縣之山水瑰奇巖居川觀專精於二氏之學者往往著異蹟即明以來王敕卜得熊諸人古之左慈費長房寧多讓耶作仙釋傳

晉

元陽子長白山人得金碧潛通一書於伏生墓中細為  
注解攜之修真於華陽宮又行為還丹訣十九年仙去  
在山人不見其飲食而晝夜燃香香不用火味遠達於

城市

齊音

按華陽宮似非晉時所有齊音不知何據

符秦

竺僧朗京兆人少而遊方問道長安還關中專當講說  
嘗與數人同共赴請行至中途忽告同輩曰君等寺中  
衣物似有竊者如言即反果有盜疏食布衣志耽人外

以偽秦皇始元年移卜泰山與隱士張忠為林下之契  
每共遊處忠後為符堅所徵行至華陰山而卒朗乃於  
金輿谷崑崙山中別立精舍聞風而造者百有餘人朗  
孜孜訓誘勞不告倦秦主苻堅欽其德素遣使賜遺堅  
後沙汰衆僧乃別詔曰朗法師戒德冰霜學徒清秀崑  
崙一山不在搜例及秦姚興亦加歎重燕主慕容德欽  
朗名行給以二縣租稅凡有來詣朗者人數多少未至  
一日輒已逆知使弟子為具飲食後卒於山中春秋八  
十有五

高僧傳

按高僧傳續高僧傳目錄俱以所居之地標名今

傳仙釋倣其例故所載不盡縣人但必久居於此或卒於此者始載如暫寄跡者不與焉

又按舊志載釋法和於金輿谷設會與安公共登山嶺云云考高僧傳法和自蜀入關住陽平寺後偽晉王姚緒請往蒲坂講說遂卒道安傳叙居止之處甚詳皆未嘗至歷城則金輿谷必非僧朗所居之金輿谷也故去之

元魏

泰山朗公谷寺釋僧意不知何許人貞確有思力每登座講說輒天花下散元魏中住泰山朗公谷聚徒教授

迄於暮齒精誠不倦奉法自資束躬供養將終前夕有  
一沙彌死來已久見形禮拜云違奉以來常為天帝驅  
使栖遑無暇廢脩道業不久天帝請師講經願因一言  
得免形苦意便沐浴燒香端坐靜室候待時至及期果  
有天神入寺及房冠服羽從偉麗殊特衆僧初見但謂  
是何世貴入山叅謁不生驚異及意至日無疾而逝方  
知靈感其都講住在兗州百餘香火叟匿散在他邑後  
試檢勘皆同日而終焉

續高僧傳

後魏末齊州釋志湛者住泰山北人頭山邃谷中銜草  
寺省事少言人鳥不亂讀誦法華人不測其素業將終

時神僧寶誌謂梁武曰北方街草寺須陀洹聖僧今日滅度湛之亡也無惱而化兩手各舒一指有梵僧云斯初果也還葬此山後發看之唯舌如故乃立塔表之今塔存焉鳥獸不敢陵踐云

神州三寶感通錄

按街草寺不知在縣境否續高僧傳云僧意志湛即朗公同侶神州塔寺三寶感通錄泰山金輿谷朗公寺者僧朗與湛意兩僧俱入東岳西北巖為終焉之地則街草寺必近神通寺故載之

又按法苑珠林云志湛山在縣人是朗公曾孫之弟子街草寺即宋求那跋摩之所立其事與續高

僧傳畧同惟云朗公曾孫弟子則大相懸矣附錄  
以俟考

隋

釋淨辯姓韋齊州人少涉儒門備聞丘索孔墨莊老是  
所詢謀忽厭浮假屏迹出家經律具嘗博通幽極後避  
世山林受習禪門息緣靜處開皇隆法入住京師依止  
遠公住淨影寺更學定境又從遷尚受攝大乘積歲研  
求遂終此業大業末年卒

續高僧傳

法安姓彭氏安定鶉狐人少出家太白山九隴精舍開  
皇中至江都晉王召見住慧日寺及駕幸泰山遇渴安



以刀刺石引水給帝後住神通寺初與王入谷安見一僧敝衣乘白驢來王問何人安曰此朗公也即創造神通故來迎耳諸奇不可廣錄十一年春無疾而終年九

十八

補志

按舊志又載釋慧藏潛於峭山據續高僧傳慧藏趙國平棘人魏書地形志中丘有鵲山祠太平寰宇記內丘縣在漢為中丘有蓬鵲山又沙溝水出鵲山東流經縣五里是蓬鵲山即鵲山平棘隸趙郡中丘隸鉅鹿相去不遠則所云潛於鵲山者非歷城鵲山也故去之

釋法瓚齊州人安心寂定樂居巖穴隱於泰岳之阜開  
蒙訓接善知方便兼以達解諦義時揚清論開皇十四  
年文帝省方招訪名德人有述其清曠者乃下勅延之  
與帝同歸達於京邑住勝光寺肅肅禪侶擁篲門庭以  
身範世復見斯日仁壽置塔勅令送舍利於神通寺時  
揚法化言無嚴切而密附懷抱遂終於所在續高僧傳

唐

道希法師者齊州歷城人也梵名室利提婆

唐云吉祥天

乃

門傳禮義家襲縉紳幼羨元門少懷貞操涉流沙之廣  
蕩觀化中天陟雪嶺之嶽岑輕生徇法行至土蕃中途

危厄恐戒檢難護遂便暫捨行至西方更復重受周遊

諸國遂達摩訶菩提耹仰聖蹤經於數載既住那爛陀

亦在俱尸國蒙菴摩羅跋國王甚相敬待在那爛陀寺

頻學大乘住輸婆伴娜

在涅槃處寺名也

專功律藏復習聲明

頗盡綱目有文情善草隸在大覺寺造唐碑一首所將

唐國新舊經論四百餘卷並在那爛陀矣淨在西國未

及相見住菴摩羅跋國遭疾而終春秋五十餘矣

釋義淨大

唐西域求法高僧傳

師鞭法師者齊州人也善禁咒閑梵語與元照師從北

天向西印度到菴摩羅割波城為國王所敬居王寺與

道希法師相見伸鄉國之好同居一夏遇疾而終年三

十五矣

同上

釋大行齊州人也後入泰山結草為衣采木而食行法  
華三昧感普賢現身遂專心念佛三七日間於半夜時  
忽睹琉璃地心眼洞明見十方佛猶如明鑑中像後詔  
入內宮寢於御殿勅賜號嘗精進菩薩授開國公乃示  
微疾右脇而終葬後開棺見儀貌如生異香芬郁焉

宋高

僧傳

宋

釋義楚俗姓裴氏相州安陽人楚七歲來省歷下臨壇

大德脩進乃楚諸父因為出家師季父省倫居香嚴院  
進誦觀音普門支經向十萬徧立禮法華經字字各拜  
拜且徹部倫則青邱主宰禪居誦大悲佛頂俱一億徧  
楚執柯伐木熏習相資登此近圓勤學不懈敏慧夙成  
造微臻極遂傳講圓暉疏十許徧顯德元年賜紫衣加  
號明教大師開寶中終於龍興伽藍俗壽七十四法臘  
五十四初楚著述心亦勞止而雙目喪明醫工莫療遂  
冥心懺過慮刪碎教文裁量差脫如是虔虔更無間息  
再歲還明人謂其徵感焉

同上

釋晉明齊州人久止靈巖晚遊五臺得風疾眉髮俱墮

百骸腐潰哀號苦楚人不忍聞忽有異人教服長松明  
不識之復告云長松長古松下取根餌之皮色似薺花  
三五寸味微苦類人參清香可愛無毒服之益人兼解  
諸蟲毒明採服不旬日髮復生顏貌如故

通水燕  
談錄

金

李笈濟南人寓臨安嘗詣淨慈寺見青衣道人林下斲  
筍揖之道人曰子來同食燒筍食之甚美道人忽不見  
笈頓覺身輕神逸行步如飛不復飲食後入蜀隱青城  
山乘雲而起

陸通  
志

按李笈陸通志列於金齊音謂為宋人又曰生於

濟南之北水門元祐二年八月十九日也今一統志又列於元魏皆不知所據

元

釋道興俗姓馬氏臨邑人母李氏嘗夜夢白光照其室因有娠既生五歲能語前生事比長禮縣之大覺禪院演公律主為師師曰此子異日必為叢林龍象山是遊學四方誓禮清涼倏覩光相心地開豁貞祐之亂隱於南山穴土為廬拾橡而食掬溪而飲精進不懈有羣盜掠人為食道興委曲勸諭皆化其德不復肆掠全活者無數元初崇釋教濟南公張榮請住持神通寺法被遐

邇皆稱為興公菩薩一日沐浴易衣索筆書偈曰八十  
餘年任運隨緣臨期一句明月青天擲筆而逝法壽八  
十四僧臘六十二

據邢天祐興公  
菩薩道德碑

淳于福滄州樂陵人禮臨淄廣化禪寺滋公為師研究  
經律悟解精微著輸金手鏡圖五十餘章以至元八年  
至歷城縣東釋迦院駐錫十三年八月勅天下僧尼赴  
都九月十三日合台薩里總統傳旨選名僧於大殿持  
論至尊臨聽自晨及晡師以辭音宏暢義理精明上意  
大悅蒙賜錢帛並普度牒以至金字戒本及金襴龍文  
大法衣師既廻錫竭力營脩十八年為掌教宗主授忘



機顯教大師之號皇慶元年九月十四夜謂門人曰時至矣汝等勿輕擲此生宜自勉勵續佛慧命及旦而化法壽八十僧臘六十

據釋智登重興釋迦院碑記

周安道號恬然子濟南人家世顯貴安道獨不仕遇玉陽師決意求仙遂居益都北鄙弟子數百人中統二年年八十五談笑示衆頌畢曲眠左肱脩然而逝頌曰八十五載紅塵斷却返白雲深處歸性體空虛等壽算風隣月伴樂希夷弟子江志海等為立祠進士王麟文於碑述其事在益都城北三十里田間

據碑

釋德雲俗姓王鄧州人金季兵亂避地濟南即神通寺

清公祝髮未幾造大都叅海雲大宗師於慶壽寺受具  
足戒因敝衲敗絮日惟一餐遠遊講席洞究經論探幽  
曠於訓釋傳授之外又訪止菴於靈巖謁玉公於湯陰  
皆蒙印可至元二年春本路耆艾疏請開堂住持神通  
寺輦土伐木修築殿宇十三年八月赴大都啟圓戒大  
會捨已衣鉢飯僧尼萬餘人後還寺德望益尊門徒益  
盛元貞二年宣授諸路釋教都總統加通理妙明禪師  
之號大德七年八月召徒衆謂之曰吾今逝矣衆請留  
頌曰平生無說臨終安用頌乎言訖而寂法壽八十有

二僧臘六十

據釋智京  
雲公碑銘

女道士馬氏失名澤州人幼出家來寓於縣之凹裏村  
廣平隱士韓志達與其徒劉道欽聞其戒行來訪之馬  
叩以道經奧義志達悉不能對喟然曰所見尤異於所  
聞矣遂共留師事之後俱著奇蹟土人因名其菴曰會

仙菴

據大德二年王  
鳳修會仙菴碑

明

禧果青州壽光人八歲被元兵掠至沙漠遂投金山寺  
師僧勝廸甚器重之勝廸死南還洪武十九年至遼東  
官司異之送至京師備言明哈赤將士萬餘人皆有降  
心朝廷命宋國公往沙漠招安果如前言上賜賚甚厚

後與禧海遊至濟南住正覺寺永樂元年遷至棲霞創

法勝菴九年八月無疾而化

陸通志

海上老人不知姓字髮如銀絲顏如渥赭雙目澄徹左手嘗握而不開日進生果三枚水一勺而已洪武壬午過濟永樂間復至成化乙巳濟南衛指揮朱顯奏聞賜名王士能

同上

無住禪師成化時住錫華林寺像貌魁岸儒書釋典無不精曉士紳雅重之以居近市塵遷四禪寺卒年九十當盛夏顏色如生觀者如堵至今塑像祀焉

舊志

楊生邑諸生喜談神仙居龍山鎮兒夜啼生紙剪一月

口吹上昇使兩月相闕百里內皆見之兒觀月以止啼  
哭巡撫某知為仙術秘訪之問作此何為生答偶與小  
兒戲耳又問尚有別術否生舉所擎茶潑之堦前水暴  
漲若降雨然公驚駭設酒餽款洽呼以仙師送之歸後  
數日再召之已攜妻子去不知所之

同上

釋慧湛姓王氏諸城人幼厭塵囂詣大靈巖寺禮大方  
和尚為師晝誦夜禪教典無不諳通忽曰悟雖由已印  
乃憑師遂歷叅諸方至浙之東明蜀之無際荆之月溪  
皆蒙印可後至廣恩於休牧翁所呈機無滯翁首肯之  
曰佛法垂秋危如一髮懸巨鼎子其力荷斯道湛遂禮

辭至台山接衆六年不擇貴賤等心供養既思歷城闕  
通山普門寺為其師禪棲處乃歸而重建之化風大播  
從者甚衆

據成化四年重修普門寺碑

釋至昂號獨峯濰縣人正統中居太平寺日跏趺靜坐  
築枯木堂集釋子數十人嚴禪觀之律自為之銘又作  
牧牛圖詩以喻調御之初難漸易詞皆淺近而義實深  
渺其聞法弟子曰理賦理賦弟子妙曇妙曇弟子悟旻  
皆有戒行

據各碑

王敕字嘉諭登第後憲宗更其字為懋倫號雲芝後易  
為竹泉成化二十年賜進士第三人授編脩謫判夷陵

陞四川僉事提學陝西河南終南京國子監祭酒博極  
羣書尤善風角習堪輿推驗多中著書如千種敕頽悟  
絕人博識古器目所未涉能知為何代物嘗讀書卧牛  
山寺與友人趙璧晚眺見山麓火光壁疑為燐敕以石  
識其處夜潛發得石函有書二冊攜歸中夜焚香展誦  
一年後能知休咎御風出神語人曰地如篩子眼地下  
珍異皆可見時與一僧山頭採杞葉僧先下比扣門敕  
為啟扃僧訝之敕笑曰我從裏間來矣其提學陝西時  
集諸生講學衆見白雲一片起簷間敕遣騎疾追至雲  
落處掘之得石白如雪命煮以餉諸生味甘美敕曰此

雲母也河南試士士坐處皆見一學使危坐終日惴惴弗寧出相語乃知其異行輝縣山間忽下與拜曰先生乃在此掘地得大石玲瓏蒼翠置之百泉書院晚歲家居前採杞僧疾且死救問曰富貴何願僧曰兼之救曰惜功行未滿且合為藩王耳因書其背是日蜀王產第二子背字隱隱王摩之應手滅縣人尹吳病甚救視之曰公尚不死俟有大鶴入庭中乃逝耳已而果然年六十餘無疾卒里人有事京師道良鄉見車從鼓吹從南來視之救也問將何往救笑曰朝廷召我耳煩歸語吾子篋中書數卷即焚之不可令人見里人歸則救以是



日死矣先是王守仁來主山東試與敕夜登千佛山見  
帝星輝耀守仁曰此在江右敕曰勿悞自在江漢守仁  
深服之縣人潘雪松為作行畧知縣張鶴鳴亦記其事  
而子孫至今猶藏其畫像焉據陸通志及張鶴  
鳴王雲芝先生傳  
王綱舉號蘭谷邑諸生素好脩養臨終預知時日預戒  
家人治道裝正襟坐化先是瘡疾及歿瘡痂盡落宛如  
童子危坐數日異香不散舊志

### 國朝

釋妙登自明崇正時居正覺寺博通釋典撰金剛經宗  
要又以楞伽經為諸佛心印而文義簡奧望崖者衆遂

研精三譯討論諸家成楞伽經宗要十卷其弟子元璽  
順治初居東佛峪之般若寺寺在萬山中亂後人跡希  
至獨處攻苦日必跪諷法華一周如是者三年據妙堅  
楞伽經  
宗要自序及順治十  
五年重修般若寺碑

王風子濟南人蓬頭裸體能治疾疾者至或噴以氣或  
擊之輒愈觀察某公病痢召風子風子曰是病將死須  
得人代死乃可問其左右侍從誰肯代乃公死者皆無  
語然則代莫如我宜風子遂病觀察愈見風子病且危  
恐其死官舍中不祥命舁諸城外古寺既出門風子則  
躍起謂其人曰爾主人不足與語我代之死而乃惡我

死乎飄然去急使追之則無及矣觀察愧悔不已

韓錫昨啟

音集

南風子亦姓王浙人因濟南先有王風子羣稱南以別之南風子乞食於杭市飽則出穢語罵人人咸逐之朱宏祚總制浙閩登吳山見其卧冰雪中異之因攜之歸濟南屢乘醉罵其座客客謀共擊風子乃辭去乞食於濟南市數載有顯者卜公子見之拜曰仙人也風子罵卜公子聲益厲公子拜益謹風子曰汝奚從識我耶遂攜公子手與之語後去不知所終

同上

卜公子名得熊字時菴號老陽子高郵人少從父宦濟

南博極羣書下筆為詩古文數千言立就歷下諸名士咸呼為卜才子登甲科後復遊歷下乃拜南風子為弟子日裸衣跣足行歌闌閨間其故交望見公子皆避去公子每乞得錢悉付酒家沽酒醉則濡墨大書寺廟屋壁歌詩諧笑大抵言人身難得易失當乘其未失而速為之所悲辭聳語間見迭出人莫之解也康熙某年春公子行乞過太清觀適觀中道士將以上已設醮多購黃白紙書文疏公子盡題寫之道士歸怒甚叱公子曰爾何不死公子曰死易耳吾所書字他年可易金錢也是夕公子死素與之遊者共葬之歷山下越三年歷下

賈人某過夏津見廟壁上所題詩大類公子書俄頃有道士自外至米公子也方悟其為尸解云

同上

劉養正縣隸也得疾將死有道士教之食淡一年而瘳遂悟死生理棄家為道士終夜危坐數月後適曝衣於庭若有以天將雨告之者時皎日無雲劉遽信之收其衣果大雨夢中又有人謂之曰日用經入道階梯也劉僅粗識字一日見鄉人敝簾中有日用經一卷袖以歸依其法行之數載舉周易老莊金碧叅同諸典典靡不渙然得其解其弟子王澍適遠出數百里外或問其歸期劉曰某日將販魚至矣既而果然問為人言數載後

事輒驗年八十五名徒衆示以去期趺坐於大方案而

化鼻垂玉筋尺餘三日顏如生

據穀音集及盛百二袖堂續筆談

王澍字際清八九歲入鄉塾受書三行終日讀不能成

誦偶過大板橋聞里中二老儒講大學定靜之義駐聽

若有得復入塾時掩卷默坐求所謂定靜者數日後獲

憶向所誦書一字不遺且多通其義矣家貧甚四子書

讀未竟旋棄去以負販為業後聞劉養正有道行從之

遊劉惟教以止念自是功益密一日夜坐黑室盡白視

手紋朗朗可數久之嚙垣亦無隔礙問其故於劉劉曰

人心之本體固如是擾擾者自汨之耳後遂博通諸書

允深於易或從之問學曰坤之上六龍戰於野人心多  
錮蔽乃純陰之卦也正當以乾陽與之猛戰一番耳又  
曰水升火降人身之易也身中有易而後聖人卦爻之  
旨天地陰陽之蘊可得而言又曰易之樞要在坎之一  
陽三百八十四爻皆一陽進退變化之象必一陽既復  
於身始信人之精神正能與天地相往來也其元悟多  
類此嘗為童子師有客將至每先令門人啟局以待問  
為詩輒上有句云秋潭百丈明珠耀夜氣千尋寶劍寒  
蓋自道其所得也善草書有逸致乾隆二十五年除  
為人書門帖畢擲筆而逝年六十澍善談名理四方士

大夫多與之遊晚年曾賣醋於西關外因皆呼為賣醋

王翁云

張廷棟採訪

李崇華字美然幼於城隍廟出家為道士南門內舜廟頽圯已久崇華竭力募脩之復脩八里窪石橋以利行人道遇癯老飢餓者必周以錢物見籠鳥網魚必買而放之善瘍科每施藥活人年八十七卒卒之夕有紅光移時不散弟子高正欽字還虛持誦道經數十年無間

一日遍辭所知而卒年七十五

龍玉珩錄送

釋印如徽州人居慈仁院善講經論聽者如雲印如死其弟子有三和尚者日沿街念佛揀瓦礫擲路旁精拳



技數十人持械擊之不能近夜卧惟首足着物肩以下  
離地尺許而酣息如雷一日謂其同侶曰我將往生曲

阜矣遂卒

鍾雪齋別集

歷城縣志卷第四十五終

歷城縣志卷第四十六

列傳十二

方伎

史記有扁鵲倉公列傳而無方伎之名漢志方伎四種  
醫經其一也後漢書於醫卜神仙皆統名之曰方術實  
本漢志而後之史家及志地理者多分為二今於縣得  
以術活人著稱今古者共五人而凡風角壬遁之精於  
其業者亦附焉為方伎傳

宋

徐遁字正權齊州秀才石介之壻也亦受學於介少嘗

學醫療病有精思有單驤者以醫名於當時言三焦有形質可見王叔和有臟無形之說非也蘇轍為齊州從事嘗為遁述驤之言遁喜曰齊嘗大饑羣凶相鬻割而食有一人皮肉盡而骨脉存者遁以學醫故往觀其五臟見右腎下有脂膜如手大者正與膀胱相對有二白脉自其中出夾脊而上貫腦意此即導引家所謂夾脊雙關者而不悟脂膜如手大者之為三焦也驤之言與所見懸合可以正今人之謬矣遁又嘗為祭閔子文為轍所稱

據歐陽修石徂徠先生墓誌及蘇轍樂城集龍川畧志

明

周繼字志齊世次見曾祖尚志傳嘉靖十四年進士授  
任邱知縣歷任太僕卿應天巡撫劾條鞭法疏奏報可  
天下便之時劉汝國叛旋經勦復上賜銀幣勞之遷南  
京戶部侍郎歷官愛士恤民本諸天性課試諸生講藝  
談道無倦期士習翕然丕變尤精陽宅之術萬歷丙戌  
署應天府印謂儒學文廟坐乾朝巽而學門居左屬震  
廟後尊經閣高大主事廟門與學門皆受乾金之尅陽  
宅以門為氣口生則福尅則禍於是以拙交換象補瀉  
之法修之於坎位起高樓曰青雲樓高於尊經閣以洩  
乾金之氣而以坎水生震巽二木以助二門之氣又於

廟門前樹巨坊與學門之坊並峙以益震巽之勢於離  
位造聚星亭使震巽二木生火以發文明之秀又以泮  
池河水不蓄於下流造木橋以過之修理甫畢遷應天  
巡撫語人曰十年間春闈必首占三榜秋試必中至十  
餘人及戊子鄉試中者僅三人榜出繼愕然乃下檄委  
一縣佐撤去學門碑屏易以木語人云來春留郤不發  
大魁吾即不信吾術已丑焦竑果殿試第一乙未朱之  
蕃亦殿試第一戊戌顧起元亦會試第一殿試第三人  
皆以為神著陽宅書若干卷

據顧起元客座贅語題庭訓本朝分省人物考及稽

按舊志謂周繼祖條鞭法而江南通志云一條鞭之法創於海忠介瑞不知孰是王文肅集有與周志齋巡撫書數通多言賦稅之事亦未及一條鞭也

尹林菴濟南人常遊長白山遇異人授以方書遂洞醫理活人無算同時陽信劉夢松濱州周宗欽從之受學後皆以醫名於世

岳通志

### 國朝

劉正岱字泰瞻少孤好學於書無所不讀以母病久遂精心學醫醫成而母病痊用是問疾者接踵正岱不擇

貧富遠近必徒步往療之極貧者或贈以藥餌錢物布政使王用霖偶患不語諸醫皆曰中風正岱後至診之曰非也乃令一人偽報用霖已擢吏部尚書加宮保用霖因大笑而語衆問其故正岱曰病因志怒傷肝閉塞心竅惟喜可勝怒固非藥物所能療也衆嘆服其治效多類此卒年七十有六

朱彤採訪

方起英字遇春義烏人少孤貧入山樵蘇以奉母猝遇虎同行者驚竄起英獨採薪自若虎注視良久掉尾去長讀書能詩尤精於醫年三十餘來縣一婦人偶病咯血動作如常起英診之辭不治未幾果歿一少女子忽

病歟衆以為已死起英視其面色曰是必天癸將至偶  
為氣鬱也以醋熏之而生所活人不可殫述巡撫岳濬  
為援例授州同職銜年六十二卒著醫書數種皆可傳

朱彤  
採訪

釋希樞字廣玉幼聰慧於千佛山下遇一道士授書一

卷自是占覆奇中居東流水之關帝廟廟旁逮某有佃  
家子為鬻羊未回問之曰某時當至當得錢若干既而  
果以其時至奇零之數皆合一遊京師公卿多折節與  
交忽辭歸歸未幾一日沐浴易衣端坐合掌而卒年三

十有二

劉士愚  
採訪



趙奇字建公居城南三皇廟街世業農奇年三十餘晨起一道士在門乞食奇欣然具饌道士曰感子朴誠授一術可濟世但勿牟利耳出瘍書一卷別去奇遂以外科名某家一處女小腹忽腫大而膚色不變其父母憂之語傳壻家汚以有身欲退婚有知奇者延之診視奇曰此小腸癰也計某日可刺矣其父告壻家至期姻眷畢集奇按穴投鍼膿出躍尺許承以盆盆盈而腹消又兩月平復女于歸稱佳婦奇沒孫正得其術

正字秀生為鹽運司掾有莊某者患內癰正謂膿已成而地近心不可刺莊舉家泣曰不刺必無生理與其不

刺而死毋寧刺而死也正擇日俾服人蔘以固氣繼用  
墨記其穴潛吸冷水向莊面嚙之鍼即隨之入蓋水被  
面驚悸氣上心亦上鍼稍遲則傷臟矣鍼出膿流敷藥  
調治百日而瘳年七十餘没人多思之

汪居敬  
採訪

歷城縣志卷第四十七

列傳十三

僑寓

周公謹之居吳興蓋自其曾祖而拳拳故土至比於齊東之野人今浙江志既不為之傳而吾志歷城亦不能援之為縣人也夫僑寓者亦豈得已哉縣當衝要而富山水四方騷人墨客僦屋而居者比比矣茲擇其跡之著者為僑寓傳舊志云絡繹而來信宿而去烏能有我山水乎

高齊

房豹字仲幹清河人體貌魁岸美音儀釋褐開府叅軍  
兼行臺郎中遷樂陵太守鎮以凝重哀矜貧弱郡治瀕  
海水味多鹹苦豹命鑿一井遂得甘泉遐邇以為政化  
所致豹罷歸後泉味復鹹豹有山池在歷城其中雜樹  
森竦泉石崇邃其叅軍尹孝逸鄴人也欲還鄴詞人餞  
宿於此孝逸為詩有風淪歷城水月倚華山樹之句為  
時所傳誦

據北齊書及  
酉陽雜俎

按豹本傳云齊滅還鄉園自養頻微辭疾終於家  
不識鄉園即謂山池否其時濟南為東冀州所謂  
清河者即今淄川房氏族甚巨皆處齊地故房彦

誨墓碑至今在章邱西境而唐書宰相世系表直云居濟南也但濟南地廣與崔氏居全節者不同又魏書自房法壽以下其子姓見史傳者多不可詰故不以入傳而僅列豹於僞寓云風淪月倚句乃尹孝逸詩而漁洋以為豹作偶不檢耳

金

劉勲字少宣雲中人勲客居濟南占籍焉少日住太學與兄譙庭老俱有聲場屋南渡後專於詩學往往為人所傳其先世本衣冠家風流蘊藉都無科舉氣見於文

字者亦然

中州志

元

李洄字漑之滕州人歷官翰林待制天歷初文宗方開奎章閣延天下知名士充學士員洄數進見奏對稱旨超遷翰林直學士俄特授奎章閣承制學士洄既為帝所知遇乃著書曰輔治篇以進文宗嘉納之朝廷有大議必使與焉會詔修經世大典洄方卧疾即強起曰此大制作也吾其可以不預力疾同修書書成既進奏旋謁告以歸復除翰林直學士遣使召之竟以疾不能起洄為文章縱橫奇變若紛錯而有條理意之所致臻極神妙每以李太白自擬當世亦以是許之僑居濟南有

湖山花竹之勝作亭曰天心水雨文宗嘗勅成集製文  
以記之洞又善書自篆隸草正皆精詣為世所珍愛卒  
年五十九

薛元史  
本傳

按舊志僑寓載扁鵲朱雲溫子昇蕭子美李白杜  
甫歐陽修朱子王磐張養浩李洞邢侗王象春孫  
之獬馮天祿共十五人今扁鵲見嵒山條下朱雲  
徙平陵溫子昇居濟陰宛句蕭子美客齊應在北  
海郡皆與此地無涉李杜歐陽僅一過此不應入  
傳而朱子更不待辨也王磐本傳所謂喜其山川  
而居者在益都不在濟南張養浩已別見邢侗王

象春已載其宅圃于古蹟且本省人之暫居歷下者多矣可勝載乎故概去之

國朝

鍾性樸字文子順天人崇正十六年進士入

國朝授濟南府推官晉禮部主事遷員外郎郎中

世祖章皇帝親政性樸於郊祀臨雍耜田大閱親蠶園陵諸大禮皆著有成書

上嘉悅賜賚有加擢山東叅議轉提學副使新城王士正德州蕭惟豫田雯諸城李澄中輩皆其首拔士也後降松潘兵備僉事道松潘地遠仕宦者咸規避去之公不顧至



則葺城郭飭戈矛諸獠部帖服縣是松潘稱西川完鎮  
復為山東叅議又備兵潯陽以病乞休愛濟南山水開  
桐園居之日讀經史百家言多著述病且歿曰吾幸與  
華泉于鱗塚土相望也遂葬于縣子孫因家焉子輟輟

自有傳

鍾憲副  
家傳

卷之四十七終

正城縣志卷第四十七終

歷城縣志卷第四十八

列傳十四

列女

自程子餓死事小之論出而閨門彌以節義為重矣我國家首正風俗激揚烈行旌勸之典下賁茅故民間女子不幸失所天茹荼飲檠而恥改適者比比也況縣自唐以來聞家世閥以文章氣節著彤史者固不絕書乎予於前載及碑刻得九人以冠列女傳

唐

歷城丞薛元曉妻濟南林氏丹陽太守洋之妹有母儀

令德博涉五經善屬文所為篇章時人多諷詠之元曖  
卒後其子彥輔彥國彥偉彥雲及從子據摠並早孤幼  
悉為林氏所訓導以至成立咸致文學之名開元天寶  
中二十年間彥輔據等七人並進士連中科名衣冠榮  
之唐書

按元曖河中寶鼎人而林氏出於濟南與李清照  
皆嫁他郡者例得采入唐詩紀事載林氏送男左  
貶詩一首泐厚可誦

元

也連貴濟南路大都督張宏女宏四女長也連貴為諸

王忽刺忽兒妃次適姜從吉次為金剛奴王妃次適洪  
澤屯田千戶梁紹祖諸王乃顏之叛連謀於兀訥忽赤  
金剛奴也速貴以逆順禍福反覆開論不聽故及於禍  
始速速詔獄有旨詰之曰若與乃顏構亂亦嘗有人諭  
止若等否彼具以妃所陳對上嘆異曰是濟南張相子  
朕知其然矣命索之軍中賜楮幣二千五百緡給傳歸  
濟南養疾有司供億元貞初山東憲司以妃忠孝大節  
素著而供需不時繼乞賜田以足廩餼事聞加賜二萬

緡

見張起巖  
張公行狀

蕭氏濟南人劉公翼妻有姿色頗通書史至正十八年

聞毛貴兵將歷境豫與夫謀曰妾詩書家女誓以冰雪自持倘城陷被執悔將何追妾以二子一女累君去作清白鬼於泉下耳夫曰事未至何急於此無何城陷蕭

解縈自縊死

元史

晉氏馬萬妻貞節至元年旌

岳通志

劉氏濟南人李名妻泰定年旌

陸通志

明

劉氏山東歷城人王榮妻大亡時年二十餘剪髮誓不他適守節四十年景泰二年十月壬申詔旌其門曰貞

節

明廢帝紀  
文王實錄

吏部尚書尹旻側室閔氏事旻甚謹旻卒閔年二十三  
慟哭幾絕自斷髮納於棺送葬城南八里山宿墓上三  
日而返與側室孔氏入靈寢墜戶持齋三年長衣方履  
日相對泣既而閔出家為尼改名道宗端坐誦佛經四  
十餘年弟子某為記其事附刻旻神道碑

據閔氏  
附葬碑

劉幾繼妻李氏幾歿李年三十教二子衍行至於成立  
備極艱苦萬歷乙酉將沒命二子曰我家自洪武元年  
居歷城汝祖諱彥深者任宛平諱瀛者任德府典儀逮  
汝父兄弟五人多有聲黷序可謂禮義之家幸吾孀居  
三十餘年以節終何恨既沒而行廬墓百日日負土三

唐濟陽張詔文其碑曰節孝記

文據碑

顏豹妻魏氏豹死子方三歲乳獨子立嘗為族人所虐  
魏搯拄其間晝汲水治菜圃夜率嫗婢紡織辛勤五十  
餘年卒萬歷三十九年其子志強遷葬之為立碑

據蔡倫墓

碑

迪功郎李寶妻張氏年二十八寶卒有三子姑楊暉於  
前子恐三子長薄其產欲奪張志張乃傾簞子之楊持  
之愈急張奉事甚謹楊病癰張溽暑躬自浣溺析箸不  
能支朝夕率日一飯以所分田貸息没入富農俾長子  
琴龍畢力讀書脫簪珥行束脩琴龍遂以文名於時官



按察使封張為太恭人

按滄縣集及四部稿

張錡妻趙氏錡沒無子趙年少典簪珥治棺衾以葬事姑視夫未亡日益加謹歲時薦奠泣失聲哀動里黨年八十族人白於官巡撫劉公巡按毛旼二公提學梅吳張三公皆稱嘆命有司具粟帛羊酒旌其賢

按版士修趙瑞人傳

右十一人稽志惟載劉公翼妻及李名妻蓋稽志所載皆已旌表及殉難死者共五十餘人其義例之嚴近世志乘所少也具錄於左

胡氏濟南衛人指揮鄧瑜妻洪武間瑜從征猺蠻臨岐囑妻守節胡許諾瑜竟死於陣胡守節終身詔旌其門

丁氏歷城人盧海僧妻正統二年旌表

王氏婦漢庶人高煦至標山下見婦汲水有美姿執留  
寨中王婦夜刺高煦不中見殺

劉氏歷城人王雲妻夫卒守節撫孤子允仕至布政使  
景泰三年旌表

丁氏濟南衛人吳環妻夫歿自縊

馮氏歷城人杜梅妻夫卒自縊

石氏歷城人張祿妻夫卒自縊同葬旌表

張氏歷城人孟訓妻旌表

韓氏歷城人范貴妻二子俱殞守節不渝旌表

按岳通志韓氏下又有井氏李廷印妻

呂氏及笄選為泰安王妃未婚王薨妃毀容絕食有司上其事旌曰女德孤貞

鄭氏女鄭海女也生有殊姿正德年流寇大肆女與母避兵禾稼中為寇所得寇欲殺其母而掠其女女攀號無計不得已扶之馬上驅迫以行時天大雨溝澮盈溢前至一灣女自馬投入寇急挽無及環視良久咨嗟而去

郭氏女正德二年遇流賊虜去義不受辱給賊飲水投河死

林氏歷城人康鉞妻正德六年遇賊死節

按正德初流賊齊彥名等破山東數十城濟南被  
寇與否舊志不載而惟載遇賊死者女子三人則  
當時被寇無疑矣林氏據陸通志作杜氏

馮氏歷城人劉法妻旌表

孟氏庠生洪綬妻旌表

盧氏女名桂香十歲為邑諸生吳愛衆養女愛衆為表  
弟仇殺妻室盡避獨女大呼手持賊襦賊刃女腦淋漓  
而死張令鶴鳴葬之郊關名曰義娥墓

蔡氏歷城人孫夢麒妻旌表

歐氏周官妻旌表

孟氏歷城人方復初妻其孫守地萬歷四十一年進士乞恩旌表建石坊於衢曰皇恩褒節

劉氏歷城人趙應時妻旌表

米氏吏王宗儒妻夫歿撫子成立吳學使給扁

程氏百戶馬斯才妻斯才從征白蓮教妖賊死於陣氏即投繯柩所旌表

汪氏指揮辛鎮都妻隨夫死節巡按王一中題旌表  
胡氏靖疆妻王一中題旌

張氏党習書妻旌表

彭氏生員趙天祐妻十九歲夫死無子守節五十四歲  
有司旌表

項氏孝廉賈槐妻已卯投井死

費氏指揮惠女孝廉張元英妻已卯自縊死

石氏趙化軍妻守節十年已卯投河死

吳氏王綱妻已卯與子允前死歷山頂

彭氏趙清允妻已卯城陷自縊

鍾氏葉汝蕃妻已卯城陷自縊

范氏王啟前妻已卯投井死

許氏生員尹湯輔妻已卯城陷有縱火焚其房者氏閉

原缺

呂氏趙士琦妻年二十八夫亡遺一子甚幼於風雪中負土成墳苦節四十餘年撫孤成立

馮氏周楠妻

劉氏周楠子元燦妻

習氏周正妾

楊氏舉人趙明徵妻年二十五夫亡苦節六十年教子成名長丁京康熙辛酉舉人次于蕃庠生壽八十餘建坊旌表

申氏監生李養泰妻養泰客死江南中守節撫孤三子皆成立



文氏李燦妻燦迎父泰泰之柩於江南以哀勞卒氏苦

節守貞數十年

翟氏羅成印妻

邢氏馮昌繼妻

王氏聶秀妻

孫氏劉文達妻

居氏曹宜彬妻

馬氏州同郭思正妻

尹氏劉之經妻

路氏趙澍初妻

陳氏王一相妻

王氏李永芳妻

高氏黃掄妻

郭氏劉觀光妻

崔氏劉超尹妻

朱氏王存印妻

李氏王陞妻

按陞後作昇必一人

于氏任嗣妻

按任嗣即任嗣廣岳志偶脫廣字

李氏張志強妻

章氏張振宗妻

戴氏監生朱懷本妻

柴氏邢日珩妻

居氏殷成章妻

王氏董文運妻

張氏監生邢起龍妻

唐氏徐世正妻

張氏劉復隆妻

楊氏張幼智妻以上俱夫亡守節康熙年旌

其云雍正年旌者六人

劉氏王允利妻夫亡守志足未嘗踰閭外撫養如子克承先業

孫氏李鳳鳴妻

趙氏王安邦妻

王氏楊英妻

史氏李進美妻

祝氏吳瑤妻以上俱夫亡守節雍正年旌

右岳通志所載今不能盡得其事實姑就其有案牘者為之傳計十三人其所謂康熙年旌雍正年旌皆謂其

人為康熙雍正間人而非被旌之年也故與冊案間不符讀者勿致疑焉

陳氏王一相妻年二十八一相沒號泣不食欲殉地下姑老矣數勸喻之乃誓守節無恆產以女工奉姑育子雍正二年旌

居氏曹宜彬妻年二十七宜彬沒姑性嚴峻居先意承志得其懽心病則侍湯藥稽首額天誓以身代教子嘉猷讀書為名諸生家門雍睦內言不出於梱非婚葬大事戚黨罕覩其面年七十二卒雍正四年旌

王氏李永芳妻年十八而寡子一歲撫之至於成立葬

舅姑皆以禮雍正五年旌年七十七卒

孫氏劉文遠妻年二十八而寡守節五十年雍正八年旌

郭氏劉觀光妻年二十五而寡教三子皆有文行苦節四十餘年雍正十二年旌

馬氏周楠繼妻齊河人輝吉女與楠相敬如賓縞客死膠州馬率前子往返千餘里歸其櫬時年二十三無子事舅姑承顏怡志得其歡撫前子元燁以文行著於鄉里家貧甚惟以紡績自給卒年四十四雍正十二年旌  
劉氏縣學廩生周元燁妻長清人生璞女年二十五元

煇卒劉痛不欲生撫綯中二子事孀姑歲稔至日一食  
勤紡績奉饌粥姑有疾劉侍藥物以勞致病且革泣曰  
姑未愈而身先死齋恨地下矣卒年四十四守節二十  
年子堂悲母捐養終其身每墓祭必大哭雍正十二年  
旌

李氏王昇妻年十九而寡上事舅姑下撫弱子皆盡其  
道年八十三卒雍正十二年旌

馬氏郭思貞妻思貞沒馬死而復甦者三家貧親操井  
臼善事舅姑教子甚嚴守節四十年雍正十二年旌  
習氏周正側室年二十九正沒時舅操江督標右營衛

銓都司三綱已前卒姑多疾習理湯藥甚謹事女君竭力盤餐教二子皆克家乾隆元年旌時年六十八祝氏吳孫妻年二十九瑤沒不食者三日誓不他適見有改節者叱曰此人狗彘不如也親操井臼奉舅姑以孝聞教子有家法乾隆二年旌

戴氏贈辰州同知朱懷本妻康熙四十八年守節為夫立嗣以嗣子燕封太宜人乾隆三年旌

于氏任嗣廣妻年二十九夫沒哀毀過甚事舅姑衣食必手親之善處娣姒間教子女皆成立年五十六卒乾隆六年旌



劉氏王允利妻瑤女年十九適允利甫百餘日而寡誓  
殉地下家人防甚嚴不得死立兄公允升子為後貧甚  
以女工資贖舅姑嘗對食嘆曰賴婦存得延餘喘但  
為吾累婦一生飢寒奈何劉強笑安慰劉通書史曰為  
娣如稱述古人義烈事家人化之乾隆十六年旌時年  
五十七

岳志附錄未旌者四人

何氏浙閩總督朱宏祚側室宏祚卒何年二十有一生  
一子撫養訓迪卒登賢書克守遺緒

朱氏守備王鉞妻夫早逝妾顧氏生子革撫之如已出

事姑孝謹備至問視必親課子義方讀書成進士願亦  
矢志全貞操作不倦邑人稱雙節

范氏李灝繼室于歸甫一載而灝卒范撫前妻子繼芳  
如已出繼芳復天又以侄繼芬子儀嗣守節四十年

馮氏施正宗妻

府志所載出於舊志及岳志外者一人

朱氏歷城農家女張斗妻明季從翁姑避難斗被虜是  
夕生一子氏時方十七有勸改適者曰我翁姑無他兒  
誰為奉養誰撫此孤勸者慚而退氏事翁姑撫孤子成  
立名純孝育四孫

山東鹽法志所載歷城節婦雖年例不甚詳而亦不可謂非見於前載也去其已見岳志者錄之得二十一人趙氏商籍歷城太學生張九如之母早年喪夫遺孤不壽兩世孤寡相倚為命側室蔣氏亦以節終

孫氏商籍歷城貢生馮汝楫保母其夫亦隸商籍明末歿於亂軍氏日夜號泣尋其遺骸不可得誓不他適苦節至終又撫馮氏之孤恩勤鞠瘁至於成名鄉人稱義歲庚午邠陽衛方伯表其墓

樊氏商籍歷城人張國珍母邑令王道降表曰節孝維風

文氏商籍歷城太學生李際芬母夫死子方五歲撫孤成立艱辛備嘗里人賢之

申氏商籍歷城范有德母原籍山西洪洞人夫死不能歸里教子經營家道再振

侯氏商籍歷城太學生張九如妻夫死子幼含藥茹荼十餘年子稍成立乃卜期葬夫並營已塋葬之前一夕設祭拜哭撫棺一慟而絕時人感其事者多投詩輓之

劉氏運學生李際廷母夫沒以詩書訓子得成立

劉氏運學生王士鴻兒婦夫死無子矢志守節撫伯氏子如已子

蔣氏商籍歷城太學生楊德言祖母知縣旌其門

按蔣氏夫名不伐少寡無子立從孫德言為後矢志堅貞能振其家聲乾隆五年旌案尚存

楊氏商籍歷城候選州同張君恩母盛年苦節撫育三子俱能成立壽至百歲卒知縣旌其盛曰人瑞永貞李氏商籍歷城人孫仰宗妻夫死遺子二人氏撫孤守節備歷艱辛五十餘年子孫繁盛人以為苦節之報孔氏商籍歷城師聖之祖母早年喪夫子病家貧艱苦萬狀壽七十五而終

柳氏商籍歷城武榜眼楊大立之母盛年喪夫撫育七

子咸登仕籍

石氏商籍歷城太學生李貢母青年喪夫守志完貞孝  
養舅姑人無間言上官給扁旌獎

宋氏商籍歷城庠生魏宏猷之妻夫死子幼病姑在堂  
矢志守節數十年姑不覺以無子為苦子不至以無父  
失教皆氏之力也

按宋氏年二十一喪夫乾隆九年旌

張氏商籍歷城人吳紹基兒婦夫死無子繼伯子為嗣  
丁氏商籍歷城人楊天延兒婦夫死無子繼伯子為嗣  
劉氏商籍歷城貢生蘇永吉母盛年苦節四十餘載知

縣旌其門年近八十

喬氏商籍歷城人劉福妻青年喪夫因姑老子幼守節三十餘年艱苦備嘗里人賢之

鍾氏學道鍾公性樸孫女商籍歷城貢生燕瑞妻盛年夫卒持立門戶訓子讀書人以巾幘丈夫目之

尹氏商籍歷城人崔應麟母青年守節撫孤奉姑日則縫紉夜則紡績以終其身

岳通志以外旌於雍正年間有事實可考者一人附侍兒一人

劉氏生員朱丕祚妻年十九適丕祚事舅姑得其歡年

二十四丕祚死無子砥志守貞族無賴某欲盡之劉藏  
利刃自防有逼其改操者劉悲痛氣結以首觸戶流血  
被體家人急救止之乃為立嗣子曰緯撫若已出兄公  
昌祚總督三省嘗遺以千金氏力却之曰孤寡無所事  
此也雍正五年旌時年九十三

朱彤  
採訪

按張貞書兩節女事一為高唐朱母劉孺人侍兒  
疑孺人即丕祚妻附錄其語於此張女者名有朱  
母劉孺人侍兒也鄒平農家子粥之孺人方十歲  
性溫柔欲為議婚女聞變色詰之掩泣對曰奴幼  
原許字某氏若改適是渝前盟也死不敢從孺人



亟覓原婿已有妻子女累累矣女終不願事他人  
壻謂兩室非貧家所宜堅不肯娶女守義彌堅孺  
人故少寡嚴禮教遂撫若己女服食居處不令偶  
儕輩年三十以疾沒康熙壬申三月事也

其案牘僅存姓氏而無事實者二人

穆氏李大振妻雍正十二年旌

穆氏王桓妻雍正十二年旌

岳通志以後節婦蒙旌表有案可稽者三十七人

蘇氏郭興程妻垠女年二十四興程沒子鈞方二歲誓  
以死殉舅姑曰誰哺嬰兒者蘇乃抱兒操作使老得所

養而幼以育舊業僅硃硃數畝蘇積絲粒為細縑答累  
拓田以至殷富年八十七卒乾隆元年旌

魏氏李鎧妻年二十一鎧沒以舅姑在不敢死其子亦  
教養成立乾隆元年旌時年五十四

劉氏霍信妻應魁女年二十九而寡事孀姑以孝聞教  
子敬如甚嚴有過輒涕泣責之敬如由行伍官鄒平汛  
把總乾隆元年旌時年六十三

孫氏貢生李嘉植妻年二十八嘉植沒僅一子嘗坐子  
於紡車旁教其讀書得補諸生年五十八卒乾隆二年  
旌

楚氏楊榮妻鰥女年二十九而寡孝養舅姑而善教其子成立年七十九卒乾隆二年旌

孔氏戴文謨妻世襲翰林院五經博士毓挺女也年二十嫁太僕卿璠第六子文謨文謨讀書曲阜以疾卒孔扶柩歸里璠為立嗣孔撫育若已出既老猶事姑朝夕弗懈姑泣曰汝孝我願汝亦得孝婦耳孔善詩瓶花鐫茗以染翰為樂有鵲吟集藉蘭閣詩草饒有風格乾隆二年旌

楊氏李玉品妻年二十九玉品沒哀號絕粒以姑老子幼勉進湯水守節五十餘年好施予鄉人德之乾隆三

年旌

陳氏朱允瑞妻年二十九而寡孝養舅姑教子有義方  
乾隆三年旌年八十一卒

衛氏楊不黨妻青年夫死撫孤至於成立乾隆五年旌  
劉氏韓廷蘭妻年二十二喪夫事舅姑甚謹又能教其  
子乾隆五年旌

楊氏張國柱妻威女夫沒時年二十八無子恪守婦道  
其祖舅張有文年百三歲祖姑王年九十一歲楊生事  
死喪皆盡禮年逾五十始繼一子待之如已出乾隆六  
年旌時年八十七

馬氏楊方興妻夫沒時年十九事舅姑至孝嚴教其子  
子雖長不敢專一事乾隆六年旌

蘇氏劉之瑛妻瑞女年二十二而寡無子立兄公子為  
子奉舅姑甘旨無缺喪葬合古禮每遇父母舅姑忌日  
輒哭失聲年五十一卒乾隆八年旌

趙氏李成才妻璋女年十七適成才二十九而寡守節  
五十八年卒乾隆八年旌

張氏盧士奇妻年十九士奇沒張方有身哭屢絕又六  
十九日生子曰繼尚撫之甚勤姑李以哭子而瞽張與  
衣刻為治藥餌日夜抱子侍於側二年而姑目復明父

之姑沒而舅以車覆折雙股艱於動履齊俗舅婦不相  
見張泣曰膝前一子尚孩提若拘常禮舅死矣晝為擗  
杖夜爰被視寢不啻子之於父也舅感其意常涕泣九  
十二歲始卒人尤以為難張康熙中卒年九十一乾隆  
九年旌

許氏田林妻年二十六林沒事舅姑甘旨無缺教子讀  
書紡績以資脩脯乾隆九年旌時年五十八

王氏上官福妻年二十七福沒截髮納棺中示無二志  
姑病為嘗糞族黨見者皆感泣子某甫生一孫而天  
曰天奪我夫又奪我子獨不能奪我志耳子婦同守節

乾隆十年旌時年八十三

李氏張奮翔妻年十六歸奮翔甫一年而寡痛幾絕以方有身舅姑百方慰解逾七十三日生子銓立志撫孤舅姑沒喪葬有禮每遇祭期輒悲哀竟日嘗謂銓曰汝未見父面祖父母又不存願作克家子以當行孝也康熙五十六年年七十四卒乾隆十年旌

張氏楊國卿妻年二十八而寡數欲自盡以家人勸沮而止事舅姑色養備至善處娣姒間嘗脫簪珥助人婚嫁教子孫有家法乾隆十一年旌時年七十四

趙氏孫捷妻年二十三而寡生一子始二歲趙孝事舅

姑而自奉甚儉甘旨不入於口治家嚴肅三姑六婆不使入門乾隆十五年旌時年六十四

蘇氏崔茂盛繼妻年二十九而寡事姑力購珍味而自食粗糲教子有法素不恒歸寧及繼母沒無子乃遷父柩擇地合葬四時祭掃蘇本洪洞人族人至縣而貧者多倚之年七十一卒乾隆十五年旌

李氏贈奉直大夫永寧州知州吳淳側室常女淳妻王氏替乃娶李氏娶三年而淳死俄女君亦死時李年二十二經理喪葬皆如禮甘淡薄遇鄉里貧乏者每周以粟布所生子永祺未一歲而孤教之至於成立乾隆十



五年旌時年六十二

聶氏吳鏌妻年二十六鏌沒或有諷以改適者終身不  
與言事舅姑以孝聞生二子責之不少假姑沒兩叔尚  
幼衣食必先叔而後其子守節三十三年乾隆十六年  
旌

孟氏張世準妻章邱生員文捷女適世準一年而寡年  
十九無子姑哭子發瘍孟侍湯藥晝夜不離側舅姑沒  
哭甚哀為夫立嗣曰德基教之補諸生屢出資助鄉里  
之不能婚葬者人咸德之乾隆十九年旌時年七十九  
葉氏候選州同錢述古妻年二十九述古沒以女紅奉

舅姑饘粥姑病親滌穢濁督二子甚嚴乾隆十九年旌  
時年七十七

高氏王維屏繼妻雲鵬女年二十適維屏甫十月而寡  
不食者數日時舅姑老前子方三歲仰事俯育備極艱  
辛年五十四卒乾隆二十一年旌

邢氏運學生員汪發祖妻貢生祖德女年二十二發祖  
沒姑病癰邢侍養惟謹喪葬舅姑皆如禮教二子先後  
入黌序乾隆二十一年旌時年五十六

吳氏楊滋掄繼妻年二十六滋掄沒吳課子世臣甚勤  
又叔滋生方幼吳撫之有恩滋生亦事之如母滋生既

長吳遂以家棟委之曰叔一家之主也世臣不幸早沒其妻陳氏年始二十三而吳已守節十八年矣陳有子旋殤乃以從子林為夫後事吳甚謹吳嘗嘆曰吾命薄早寡幸得此孝婦無憾也及吳年逾七十陳亦年五十六乾隆二十二年皆被旌

崔氏袁嗣光妻年二十二而寡有子二人事舅姑定省無懈叔嗣德早沒其妻李氏年二十四有子一人崔與共荼苦形影相弔及李守節三十一年而崔已守節四十五年矣族黨同為請旌乾隆二十四年建坊

陳氏余繼寧妻年十九適繼寧二年而繼寧沒生子方

四月陳撫之至成立又善事舅姑以孝聞年七十一卒  
乾隆二十四年旌

徐氏李際芬側室江南崑山人歸際芬貞靜有婦德事  
女君甚謹族姓中皆稱其賢際芬卒徐年二十六無子  
女矢志守節歷三十二年卒乾隆二十四年旌

李氏魯宏基妻年二十一而宏基沒李事宏基祖父母  
父母以孝聞姑患癰李艱苦備嘗戚黨罕見其面教子  
有法乾隆二十五年旌時年七十七

李氏朱之正妻年二十九而寡苦節自守孝於舅姑善  
於教子乾隆二十六年旌

潘氏韓遐齡妻年二十四而寡僅有田三畝以紡績奉舅姑育諸子子有補諸生者乾隆二十六年旌時年六十二

韓氏安邱人適同縣陳士愷數年而遷居縣之郭店生四子士愷沒韓時年二十六貧甚無親故通勉事其舅教子皆成立年七十九卒乾隆二十八年給扁旌表其子玉振請於縣願自建小石坊於母墓鐫部頒清標彤管四字其上知縣史錦許之

孔氏韋祺妻年二十六而寡遇祺忌日必痛哭塚上舅姑沒葬祭皆如禮乾隆二十八年給扁旌表時年七十

一  
其已旌節婦有案可憑而未得其事實者六人

李氏朱之植妻乾隆二年旌

王氏徐炳繼妻乾隆二年旌

張氏劉復隆妻乾隆二年旌

郭氏周國璽妻乾隆五年旌

陳氏傅元兆妻乾隆六年旌

宋氏劉永述妻乾隆十二年旌

岳志後旌表貞壽者三人

張氏劉洪祿妻長清生員朝女明崇正九年十月二十

九日生年十九適洪祿事舅姑以孝聞舅姑相繼沒遂  
不如葦不衣帛終其身乾隆元年年一百一歲有司以  
聞建坊旌表曰貞壽之門

曹氏生員山生苞妻順治十四年生至乾隆二十一年  
年百歲猶強健早年孝事舅姑治家勤儉有司請於朝  
建坊旌表曰貞壽之門

蘇氏太學生李珩繼妻慈柔有婦德能治家撫前子無  
異已出凡子姓戚黨可造就者皆資以膏火多登科目  
順治十八年生至乾隆二十五年年百歲建坊旌表曰  
貞壽之門

岳志後以義不受污死而得旌者一人

李氏王松子妻南會清一地方人家貧甚舅大信及松子皆入城傭工姑劉為人家熨嫗不恒歸村人李奉山素窺其美欲污之乾隆五年閏六月二十九日夜乘李與小姑三姐方眠踰垣入室手拂李李覺起曳其帶大呼奉山懼不得脫連及李左右脇逸去李出追而仆鄰家執奉山鳴官李以創重延至七月四日死官置奉山於法李得請旌明年五月給銀建坊設位節孝祠予之重輯縣志也古人之出入以書近人之出入以公論而於節婦未邀旌典者則以採訪諸君為主而已無



與焉其所採訪有奇苦及殉夫以死者始為之傳共得七人又孝女一人

劉搖頭妻逸其氏明季城陷遇害者甚多氏為張氏婢抱其主男一女一避大明湖蘆葦中晝伏夜出丐飯哺其主遇人以鐵盂傷其首主因獲全而婢後嫁劉搖頭張今居渴馬莊族姓繁衍皆婢之所遺也

李廼黃錄送

韓氏褚懷玉妻年二十而寡子方週歲服除歸寧母勸改適韓大哭自是不歸寧者二十年惟使人候父母起居而已事舅姑甚孝今年八十七子年六十八歲孫五曾孫六元孫二皆以為苦節之報也

孫尚廉訪

錢氏孫德勝繼妻年一十九而寡貧無立錫或勸之嫁  
泣曰吾別適二子必餓死吾夫無後矣攜二子行乞於  
鄰村村人多憐而食之後二子長傭工以養母乃不為  
丐今年七十餘

朱彤  
採訪

劉氏張增禮妻年二十六增禮沒無子以兄公增仁子  
為後劉竭力治喪葬之夕自縊死康熙五十九年四月

事

何永盛  
採訪

蘇氏謝國璋妻年十六適璋越五年國璋沒無子將葬  
蘇請為二壙舅曰寄葬耳無庸為百年計葬後舅與其  
父密語庭中蘇疑為將嫁已泣欲自盡舅令姑與同卧

起又四年蘇歸寧母家家人諷之曰汝守無可守繼無可繼不如改適也逼之再四蘇大怒出姑家至夜以紅索縊死紅索蓋母家婚事所用者蘇恐母家誣姑逼已故用母家物也

韓燭採訪

孫氏韓富妻富病瘵艱於藥物自知必不起投繯死舅姑以孫無子又貧甚延其父議嫁之孫大哭自經死乾隆二十七年十二月二十四日也年僅十八

呂克治採訪

楊氏李璠妻乾隆三十一年十二月璠歿楊數欲自盡家人防甚嚴明年五月隨姑祭璠墓歸整冠笄自經室

中年二十八

朱彤孫曾延鄭紹採訪

孟氏章文錦妻匡山莊人廷秀女年十六歸文錦越十年夫歿既葬孟乃以夫腰所繫帶自縊翁姑救之得甦姑病瘵每飯孟必操匙箸進食如是者三年文錦無子弟文燦方幼孟養教之至於成立後文燦生三子乃以一子為文錦後今年五十九守節三十三年

賈理採訪

曾孝女名衍綸柳州知州尚增女也母張宜人衍綸生六歲誦毛詩曉大義對家人言笑不苟逾十歲從事翰墨輒工讀書閱黃香丁蘭諸孝義事反覆吟諷歛歛若不自勝者尚增任柳州時張病瘵衍綸侍湯藥躬梳盥晨夕不暫離會寢舍老嫗遺火漏四下始燄燄及帷幔

衍綸以手撲不滅大呼家人集毀門入張度不能免促  
尚增掖衍綸出行綸號哭挽母臂不肯釋家人負尚增  
出火熾甚遂不能復入衍綸於烈燄中呼母轉急既漸  
微燼矣乾隆二十三年十二月二十四日也年十五詰  
朝撥灰出之衍綸抱母兩尸合為一堅凝若黥炭見者

莫不泣下州人為立祠於柳江寺側

桑調元曾  
孝女傳

其餘採訪所及年未三十守節至三十年或十五年以  
上而沒者皆於旌表之例相符其孝舅姑撫孤立祠事  
行畧同不復各為之傳今特分別里居列其姓氏而書  
採訪者之名以昭慎重焉

吳志祥妻于氏范隨妻楊運祥妻劉氏李學祿妻  
高氏呂懷濟妻韓氏蘇玉珍妻金氏孫廷玉妻王氏于  
崙妻王氏孫璽王妻趙氏孫鑄妻趙氏仇雲妻劉氏朱  
允妻陳氏陳順妻岳氏王永福妻韓氏呂景程妻李氏  
侯佩妻黃氏呂成璉妻郭氏呂克諧妻于氏李振世妻  
曹氏李希賢妻畢氏李鉅妻蘇氏韓燭宗妻王氏陳守  
玉妻趙氏

右呂克治採訪共二十三人

劉志水妻張氏王廷階妻党氏許文進妻滕氏張思厚  
妻董氏張超祥妻支氏陳精妻王氏何玳妻秦氏陳仕

妻段氏婁士德妻劉氏張如蘭妻韓氏陳偉妻韓氏張繼齡妻杜氏

右張集採訪共十二人

朱崇道妻劉氏妾李氏朱崇謙妻王氏鄭士宏妻郭氏朱緗妾李氏

右汪居敬採訪共五人

張從學妻懷氏李奇妻趙氏楊世臣妻陳氏徐盡臣妻李氏徐盡善妻滕氏師彥麟妻孔氏丁可發妻張氏高好義妻吳氏丁仁妻王氏高志勇妻吳氏盧錕妻李氏張望妻王氏張挺妻鄧氏周偕妻孫氏周永祺妻張氏

劉貞元繼妻王氏王暉妻魏氏周文學妻馬氏郭志義妻胡氏劉浩妻萬氏

右張廷棟採訪共二十人

孫琦妻于氏韓學宗妻党氏黃珂妻馬氏王雲鳳妻楊氏高永祥妻劉氏党埏妻郭氏王璵妻韓氏張璞妻孫氏宋文子妻陳氏閔家珍妻党氏

右党其超採訪共十人

朱之經繼妻錢氏李友蟠妻崔氏潘理妻劉氏孫玠妻莊氏李廷玟妻裴氏杜志友妻張氏徐耀妻顧氏王不績妻晉氏劉之紀繼妻王氏



右劉士愚採訪共九人

江永燾妻陳氏戴煌妻艾氏

右朱曾傳採訪共二人

朱肇魯妻王氏王文舉妻胡氏汪憲祖繼妻邢氏王承  
祖妻楊氏王文祥妻季氏冉耀宗妻王氏段奇桂妻苑  
氏李必勝妻崔氏胡元檜妻王氏張福妻章氏王太運  
妻王氏朱綵妾劉氏李寅妻魏氏李廷雋妻孫氏葉芹  
香妻周氏王廷蕙妻楊氏合二莊劉某妻段氏鄭以安  
妻盧氏汪鱗妻陳氏戴元禮妻錢氏

右朱彤孫曾延鄭銘採訪共二十人

宋琇妻王氏宋朝相妻孟氏曹貫斗妻張氏李成業妻  
趙氏王奎寧妻楊氏張魁斗妻彭氏李臻妻宋氏王炳  
妻李氏賈俊氏妻趙氏路璉妻李氏趙順子妻王氏王  
秉可妻彭氏白萬有妻趙氏范正妻程氏呂中興妻王  
氏張之梁妻張氏馬自榮妻寇氏張珍妻許氏

右李枝華採訪共十八人

張國祥妻王氏李文舉妻李氏李如蘭妻張氏翟藩妻  
李氏王士震妻萬氏魏松基妻王氏劉瑛妻李氏陳福  
永妻王氏劉燦繼妻楊氏高松妻王氏何萬斛妻孫氏  
徐鵬振妻陳氏魏榮基妻楊氏賈潛思妾王氏苗成妻

楊氏徐承祚妻薄氏柴會年妻陳氏張汝為妻吳氏余友曾妻褚氏王元履妻張氏劉琢妻楊氏鄧志堯妻李氏懷國玉妻王氏井有禮妻郭氏李玉瑛妻張氏韓璠妻王氏梁輅妻姚氏梁君陽妻馬氏蓋岐妻李氏王曰妻張氏劉舉妻孫氏司貞麟妻劉氏王采妻閔氏徐錫祚妻秦氏魏文潤妻楊氏王永芳妻王氏鄭起盛妻劉氏

右張毓檜賈瑤崔鈎何永盛採訪共三十七人

鍾坦妻王氏

右鍾勲採訪一人

韓焯妻楊氏紀嗣祉妻呂氏張光祖妻張氏張璉妻劉氏毛大壽妻田氏魏釗妻陳氏

右賈振基採訪共六人

李法妻郭氏侯振美妻段氏路濱妻張氏王朝臣妻芮氏王繼祚妻党氏王朝均妻李氏趙蘭妻李氏李嘉抱妻徐氏李嘉本妻趙氏劉玉芳妻張氏

右韓燭採訪共十人

陳悅妻傅氏劉勇妻徐氏陳存妻元氏

右陳志剛採訪共三人

劉性傳妻張氏劉公弼妻劉氏劉志美妻崔氏劉元翰

妻吳氏孫談妻郝氏孫煜妻胥氏劉性善妻李氏孫丕  
端妻張氏孫復興妻孫氏趙光勲妻周氏劉振海妻劉  
氏張一忠妻劉氏

右孫尚採訪共十二人

歷城縣志卷第四十八終